



29 September 2017
29 September 2017
P.U. (A) 287

WARTA KERAJAAN PERSEKUTUAN

*FEDERAL GOVERNMENT
GAZETTE*

PERATURAN-PERATURAN KANAK-KANAK
(PEMELIHARAAN BERASASKAN KELUARGA) 2017

CHILD (FAMILY BASED CARE) REGULATIONS 2017

DISIARKAN OLEH/
PUBLISHED BY
JABATAN PEGUAM NEGARA/
ATTORNEY GENERAL'S CHAMBERS

AKTA KANAK-KANAK 2001

PERATURAN-PERATURAN KANAK-KANAK
(PEMELIHARAAN BERASASKAN KELUARGA) 2017

SUSUNAN PERATURAN-PERATURAN

Peraturan

1. Nama dan permulaan kuat kuasa
2. Pemakaian
3. Pemilihan dan kelayakan
4. Kewajipan penyedia pemeliharaan berasaskan keluarga
5. Kewajipan ibu atau bapa atau penjaga
6. Rekod hendaklah disimpan

AKTA KANAK-KANAK 2001

PERATURAN-PERATURAN KANAK-KANAK
(PEMELIHARAAN BERASASKAN KELUARGA) 2017

PADA menjalankan kuasa yang diberikan oleh seksyen 128 Akta Kanak-Kanak 2001 [*Akta 611*], Menteri membuat peraturan-peraturan yang berikut:

Nama dan permulaan kuat kuasa

1. (1) Peraturan-peraturan ini bolehlah dinamakan **Peraturan-Peraturan Kanak-Kanak (Pemeliharaan Berasaskan Keluarga) 2017**.

(2) Peraturan-Peraturan ini mula berkuat kuasa pada 1 Oktober 2017.

Pemakaian

2. Peraturan-Peraturan ini terpakai bagi kanak-kanak yang diletakkan dalam pemeliharaan mana-mana orang yang menyediakan pemeliharaan berasaskan keluarga dengan suatu perintah Mahkamah Bagi Kanak-Kanak di bawah subseksyen 30(1), 40(1) atau 46(5) Akta, atau dengan waran di bawah tandatangan Pelindung di bawah subseksyen 35(4) atau 37(6) Akta.

Pemilihan dan kelayakan

3. (1) Tertakluk kepada subperaturan (2), Ketua Pengarah boleh memilih mana-mana orang yang layak atau sesuai untuk menjadi penyedia pemeliharaan berasaskan keluarga sebagaimana yang difikirkannya perlu atau suai manfaat bagi maksud subseksyen 30(1), 35(4), 37(6), 40(1) dan 46(5) Akta.

(2) Seseorang adalah layak atau sesuai menjadi penyedia pemeliharaan berasaskan keluarga jika—

- (a) dia seorang warganegara atau penduduk tetap Malaysia;
- (b) dia berupaya mengadakan pemeliharaan yang mencukupi untuk kanak-kanak yang diletakkan dalam pemeliharaan, jagaan dan kawalannya;
- (c) dia tidak pernah disabitkan atas apa-apa kesalahan jenayah atau shariah di bawah mana-mana undang-undang bertulis yang boleh dihukum dengan pemenjaraan, sama ada pemenjaraan sahaja atau sebagai tambahan kepada denda atau sebagai ganti denda, selama lebih daripada tiga tahun; dan
- (d) dia telah hadir apa-apa sesi kaunseling atau kursus sebagaimana yang ditentukan oleh Ketua Pengarah.

(3) Walau apa pun perenggan (2)(a), jika kanak-kanak yang hendak diletakkan dalam pemeliharaan berasaskan keluarga ialah bukan warganegara Malaysia, Ketua Pengarah boleh memilih mana-mana bukan warganegara sebagai penyedia pemeliharaan berasaskan keluarga untuk kanak-kanak itu.

Kewajipan penyedia pemeliharaan berasaskan keluarga

4. (1) Penyedia pemeliharaan berasaskan keluarga hendaklah mempunyai kewajipan yang berikut:

- (a) untuk memastikan bahawa pemeliharaan dan perlindungan kanak-kanak berasaskan kasih sayang dan kemesraan, dan nilai moral dan rohani yang baik;
- (b) untuk memastikan bahawa perkembangan, kebajikan, kesihatan dan kesejahteraan kanak-kanak diuruskan dengan cara yang sepatutnya mengikut keperluan kanak-kanak itu;

- (c) untuk menyediakan premis yang selamat, bersih dan selesa bagi kanak-kanak dan tinggal di dalam premis yang sama dengan kanak-kanak itu;
- (d) untuk melindungi kepentingan kanak-kanak;
- (e) untuk menyediakan makanan yang sihat dan pakaian yang mencukupi bagi kanak-kanak mengikut keperluan kanak-kanak itu;
- (f) untuk menyediakan pendidikan yang sepatutnya bagi kanak-kanak termasuklah pendidikan moral dan rohani;
- (g) untuk memastikan bahawa kanak-kanak menghadiri apa-apa sesi bimbingan dan kaunseling yang dijalankan oleh seorang kaunselor, jika perlu;
- (h) untuk memastikan keselamatan kanak-kanak;
- (i) untuk memastikan bahawa kanak-kanak menerima rawatan perubatan atau pergigian, jika perlu;
- (j) untuk memastikan bahawa semua barang peribadi dan rekod kanak-kanak disimpan dan ditempatkan dalam simpanan selamat;
- (k) untuk melaporkan dalam tempoh dua puluh empat jam apa-apa kecederaan yang serius atau penyakit yang serius yang dialami oleh kanak-kanak kepada Pelindung atau pegawai akhlak;
- (l) untuk melaporkan dalam tempoh dua puluh empat jam apa-apa keganasan yang dilakukan terhadap kanak-kanak atau kematian kanak-kanak kepada polis, dan Pelindung atau pegawai akhlak;